

PPN 2145 577785

3.

CLAVDII GALENI
PERGAMENI PARA-
PHRASIS IN MENODOTI
Exhortationem ad liberalium
artium studia.

EX DES. ERASMI *7*N-
terpretatione, à Federico Iamotio Medico
recognita, & Annotationibus illustrata.




FED. MORELLI DISTICHON.

*Iste GALENVS opes tibi conferet, addet honores:
Quique Galenus erat, Iustinianus erit.*

LVTETIÆ,
Apud Fed. Morellum Typographum Regium,
via Iacobeæ, ad insigne Fontis.
M. D. LXXXIII.

CVM REGIS PRIVILEGIO.



FEDERICVS IAMOTIVS
MEDICVS PETRO ET
CAROLO FILIIS S. D.



*V*M omniū artium genera, quibus Vita utilita-
tem capit atque excolitur, laudanda sint, tum ve-
rò imprimis ea, quibus ad virtutem eruditur &
informatur, amplectenda videntur. Homines
enim cū à Deo Opt. Max. ad virtutem geniti
& facti sint, si virtutis & honesti expertes vi-
uant, non viuere, sed mori & funerari potius dicendi sunt. Atque
ea quidem cū duabus rationibus constant, præceptis tradendis atque
exemplis proponendis, quorum primum philosophia, alterum historia
suppeditat: quæsitum diu & disputatum est, Vtrum laude dignius,
Vtrum fructuosius vitæ humanæ benè beatæque degendæ esset. Et
quidem philosophia vt benè viuendi fons, ita artium omnium pa-
rens, quin vitæ in omnes partes ad virtutem & omnia officia confor-
mandæ & erudiendæ planè necessaria sit, nemo est, nisi immani &
barbaro ingenio præditus, qui negare audeat. Ea ignorantia tene-
bras discuit: ea non solum viam publicam, sed & calles & semitas
omnes, quibus cuique insistendum sit, præscribit & indicat. Ea
virtutis indagandæ, vitiorum expellendorum, legum inueniendarum,
morum & disciplinæ constituendæ præcepta tradit. Sed ea cuiusmodi
sint tum demum intelligimus, cū vsu & experientia se proferunt,
dum obseruata, hominibus fructum & gloriam, spreta autem &
violata, dedecus & damnum attulisse videmus. Nam donec verbis
duntaxat sine vllis euentis, quid fugiendum, quid sequendum sit,
idque angustis & concisis disputationibus illigata, vt ait Antonius
apud Ciceronem, breuiter & satis aride docent, minus afficiunt, in-
que hominum animos minus altè descendunt. At dum obseruata in
magnum decus extulisse, magnas opes & commoda peperisse: con-
tempta verò exitium infamiamque attulisse legimus, expergiscimur,
commouemur, exuscitatur. Adde quòd aculeis maioribus extimula-
mur, cū id non spinosè & iciunè, sed amplè, copiosè, & ornatè
nobis

nobis velut in speculo representantur. Quæ cum nobis ex historia à viro docto & diserto conscripta contingant, quis est qui non assidue eruditorum hominum historias manibus versauerit? Danda est igitur vobis opera, Filij, vt ne sic philosophiam amplectamini, vt interim historiam relinquatis: imò, quod ait Flaccus, de arte & natura, Alterius cum Altera poscat opem res, & coniuret amicè: ijs potissimum scriptoribus plurimum tribuatis, plurimum & temporis & diligentie detis, qui philosophiam cum historia, id est, præcepta cum exemplis coniunxerunt & copularunt. Quem in numerum referre licet Aristotelem, qui in ijs libris, quos de Republica scripsit, quantum hæc exempla ad vitam rectè constituendam profutura sint, satis arguit, dum huius generis propemodum infinitis sua decreta confirmat, & ijs productis, quid sequendum in vita, quid fugiendum sit, edocet. Verum enimverò doctorum omnium iudicio & testificatione constat, Plutarchum in ijs, qui philosophiæ historiæque coniunctione clarent, longè principem locum obtinere. Neque enim quisquam est, qui aut vberiore rerum copia philosophiam persecutus sit, aut præclarioribus exemplis è media historia petitis ornauerit atque illustrarit. Itaque non illepide vir quidam doctissimus dixit, Plutarchi opera moralia esse aulæ quædam diuersis verborum, sententiarum & exemplorum coloribus picturata: vt eo nomine vnus inter Latinos Græcosque philosophos ac historicos studiosè ab omnibus legendus esse videatur. Non dubium est tamen, quin Galeno quoque medicorum (Hippocratem semper excipio) facile principi, hac in parte suus constet honos. Id ex hac vna exhortatione ad bonarum artium studia perspicere licet, quam à Menodoto quadam rudi tantum opera scriptam & quasi adumbratam, Galenus paraphrasi expressit ac perpoliuit: vobis hisce miseris atque perditis temporibus non minus necessariam quàm vtilem futuram. Plurimis enim tum sententijs tum exemplis monet adolescentes, diuitiarum, formæ, nobilitatis & virium gloriam fluxam esse atque fragilem: solam artium cognitionem claram eternamque haberi: vt omnium adolescentium studia excitari debeant ad laudandarum artium scientiam, quæ & parandæ veræ gloriæ rationem pollicentur, & augendæ rei familiaris expeditam ac facilem omnibus viam commonstrant. ceterum duplex cum esset

Latina huius libelli interpretatio, altera Ludouici Bellisarij medici Mutinensis, altera Des. Erasmi Roterodami, viri eruditionis nomine Vbique terrarum notiac nobilis: illa certis de causis pretermissa, hanc vobis exhibuimus à nobis recognitam, & quibusdam annotationibus explicatam atque illustratam. Id autem cuiusque modi est, Filij, vobis donādum & in vestro nomine diulgādum esse putauimus, tūm vt quæ aliquando ex nobis Græcè cognouistis, nunc Latine recognoscatis: tūm vt hoc veluti laboris & industriæ stimulo concitati, in artium honestarum & Reip. vtilium stadia alacriter decurratis, in eoque vobis tam diu elaborandum putetis, quoad vberēs atque maturos nobis edatis studiorum vestrorum fructus. Valete.

* *



CLAVDII GALENI
PERGAMENI PARAPHRASIS
IN MENODOTI EXHORTATIONEM
ad artium liberalium studia.

EX DES. ERASMI ROT.

*interpretatione, à Federico Jamotio
Medico recognita.*



N animantia quæ dicuntur bruta, prorsus expertia sint rationis, nondum satis liquet. Fortassis enim tametsi non habent eam rationem, ^a quæ iuxta vocem intelligitur, nobiscum communem, quam vocant enuntiationem, certè eam ^b quæ secundum animam accipitur, quam rationem appellant affectuum capacem, habent nobiscum communem omnia, licet alia magis, alia minus. Perspicuum sanè est hominem hac parte longè cæteris animantibus antecellere, vel ex illo quòd cernimus, quanta sit artium multitudo, quas hoc animal tractat: vel ex hoc, quòd solus homo scientiæ capax, quancunque velit artem percipit. Siquidem animantia reliqua ferè omnia sunt artium expertia, si pauca quædam hinc excipias. Quin his etiam ipsis natura magis quàm instituto contigerunt artes. Cæterùm nec apud illa quicquam est artium, quod homo non meditetur, sed in arte texendi imitatus est araneas, in arte fingendi, quam plasticen vocant, apes: nec imperitus est natandi, cùm sit animal terrestre. Iam nec diuinis artibus destituitur, imitans &

i.
a. quæ in pronuntiatione sita est.

2.
b. quæ in anima consistit, quâ mente conceptam appellât, habent.

3.
4.
5.
6.

7. *Æsculapij, quæ eadem est Apollinis, medicam artem, ac cæteras item omnes quas habet Apollo, iaculandi, canendi, diuinandi: adhæc quam vnaquæque Musarum habet peculiam, nec geometriæ nec astronomiæ experts. Verum & ea quæ subter humum sunt, & ea quæ supra cælos sunt, quemadmodum ait Pindarus, contemplatur. Denique bonorum omnium maximum sua sibi parauit industria, Philosophiam. Has igitur ob causas, quanquam cæteris animantibus non deest ratio, tamen solus homo vocatur ratione præditus, quod omnibus antecellat. An nõ igitur turpissimum est, id quod vnum nobis inest commune cum Dijs negligere, aliarum verò rerum studio teneri, ac spreta artium perceptione, fortunæ nos ipsos committere?*
8. *Cuius improbitatē nobis ob oculos ponere volētes prisci, non sat habuere eam repræsentare muliebri specie, tum picturis tum statuis (quanquam hoc ipsum satis magnum erat amētiae signum) verum & clauū illi dederunt in manibus,*
9. *ac pedibus subiecerūt basim figura spheræ: tum & oculis eam priuarunt, nimirum his omnibus declarātes illius inconstantiam. Quemadmodum igitur in naui vehemēter iactata tempestate, aded vt periculum sit, ne procellis ac fluctibus obruta demergatur in profundum, perperam fecerit, qui cæco gubernatori clauum commiserit: itidem opinor in vita, cū hīc in permultis ædibus grauiora fiant naufragia, quàm scaphis accidunt in mari, non rectē iudicarit, qui semetipsum in tantis negotijs vndique circumstantibus ac vallantibus, cæcæ commiserit Deæ, nec huic satis stabili. Aded enim stupida ac demens est, vt plerunque bonis viris præteritis, quorum oportebat haberi rationem, locupletet indignos, ac ne id quidem constanter, sed tantisper donec rursus pari, qua dedit, temeritate eripiat donata. Hanc Deam sequitur turba non mediocris hominum ineruditorum, nunquam eodem in statu manentem, propter basim, cui insistit, volubilitatem, quæ illam huc illuc agit rapitque per præcipitia, nonnunquam & in mare. Ibi pariter intereunt omnes illam sequentes, cæterum illa sola euadit indemnis & illæsa, ridens interim plorantes, & ipsius*

ipsius opem frustra implorantes, cùm hinc iam nulla sit illis
 utilitas. Atque huiusmodi sunt Fortunæ facta. Porro Mercu-
 rium tanquam rationis dominum, omnísque artis auctorem,
 considera rursus, quàm diuersa quàmque pugnante cum
 Fortunæ simulachro forma, repræsentarunt illi prisci, tum
 picturis tum statuis. Adolescens est formosus, nequaquam
 habens pulchritudinem ascititiam, aut artificio comptorum
 additam, sed talem, vt protinus in ea reluceat animi virtus.
 Est autem hilari vultu, oculis acribus. Basis autem cui infi-
 sit, est omnium figurarum firmissima, minimèque volubilis,
 videlicet vndique quatuor angulis nitens tessera. Interdum
 & ipsum Deum hac figura repræsentant. Videas autem & hu-
 ius cultores similiter hilares, quemadmodum est is quem se-
 quuntur, nec vnquam de illo querentes, quod solent ij qui
 sequuntur Fortunam. Nec destituuntur vnquam, nec seiun-
 guntur ab eo, sed perpetuò sequuntur illum, & illius proui-
 dentia fruuntur. Contrà qui Fortunam sequuntur, videre li-
 cet inertes ac disciplinarum indociles, semper inhiantes spe
 duci, cùmque corrente Dea currere, alios quidem propius,
 alios verò procul: nonnullos verò & ab illius manu pendere.
 Inter hos omnes videbis & Cræsum illum Lydum, & Poly-
 cratem Samium, ac fortassis miraberis alteri quidem Pacto-
 lum affluxu suo inuehentem aurum, alteri verò marinos etiã
 pisces subseruientes. Cum his rursus & Cyrum videbis, &
 Priamum & Dionysium. Verùm paulo pòst ex his ipsis haud
 eodem in statu conspicias Polycratem in crucem suffixum,
 tum Cyro subactum Cræsum, rursus Cyrum aliorum imper-
 rio subiectum: videbis & Priamum inclusum, & Dionysium
 Corinthi. Quòd si contempleris illos, qui procul insequun-
 tur eam currentem, nec tamen assequuntur, nimirum pror-
 fus oderis eum chorum. Sunt enim hic oratores permulti, me-
 retrices & scortatores, & amicorum proditores: sunt & ho-
 micidæ, & monumentorum perfossiores ac rapaces. Com-
 plures item, qui ne Dijs quidem pepercerint, sed hos sacrile-
 gio compilarint. Cæterum in altero choro omnes modesti, &

10.

11.

12.

13.

14.

15.

artium opifices, neque currunt neque vociferantur, neque inter se decertant, sed inter illos medius est Deus, & circum hunc suo quisque loco cōpositus, nec ordinem, quem cuique dedit Deus, deferunt, alij quidem Deo proximi, & hunc ordine composito cingentes, videlicet geometræ, arithmetici, philosophi, medici, astronomi & grammatici. Hos sequitur alter chorus, pictores, plastæ, ^a scriptores, fabri & architecti, ^b lapidarij. Post hos sequitur ordo tertius, reliquas artes omnes continens, sic in ordinem digestis singulis, vt omnes tamen ad Deum communem vertant oculos, iussis illius pariter obtemperantes. Conspicies quidem & hîc numerosam multitudinem adhærentium Deo. Cæterum videbis & quartum quēdam chorum à cæteris selectum atque extraordinarium, non quales erant illi qui Fortunam comitabantur. Non enim ex dignitatibus ciuilibus, neque ex generis claritate, neque ex diuitiis consuevit Deus hic præstâtissimos iudicare, sed qui cum virtute vitam agerēt, quique in suis artibus excellerent, quique præceptis ipsius obsequerentur, ac legitimè suas exercerent artes: hos & magnificat, & cæteris antepōnit, sibi coniunctissimos habens semper. Hunc, ni fallor, chorum, qualis sit si nosses, non solum admirareris, verum etiam adorares. In hoc est Socrates, & Homerus, & Hippocrates, & Plato, & horum studiosi (quos pari cum Diis honore dignamur) tanquam ^a affectatores ac ministros quosdam Dei. Quamquam ne cæterorum quidem quisquam fuit vnquam à Deo neglectus. Non solum enim præsentium curam habet, verum etiam & nauigantibus adest, nec in naufragio destituit. Aristippus igitur, cum aliquando nauigans fracta scapha in littus Syracusanum eiectus esset, primùm quidem bono animo esse cœpit, cum in arena vidisset descriptas lineas geometricas: reputabat enim sese ad Græcos ac sapientes viros, non ad barbaros peruenisse. Post vbi venisset in Syracusiorum gymnasium, & hosce versus pronuntiasset,

16. a. literatores, fab. 16. b. lapicida. Post. 17.

18. a. præfecti ac ministri quidam Dei.

19. „ Quis Oedipum in diem vagantem & exulem
„ Donis recipiet hoc die rarissimis?

& habuit qui ipsum conuenirent, & agnito protinus omnia, quibus opus erat, impertirent. Deinde cum essent qui in Cyrenem illius patriam nauigaturi percontarētur, numquid ad suos vellet scribere: iubete, inquit, illos has sibi parare possessiones, quæ naui fracta simul enatant cum possessore. Cæterum multi infelices, & omnia diuitiis metientes, si quando incidunt in talem calamitatem, aurum aut argētum suspendunt ac circumponunt corpori, simulque cum illis perdunt & vitam: ne id quidem apud se reputantes, quod ipsi ex brutis animantibus ea potissimum amplectuntur, quæ sunt artibus ornata. Siquidem equos ad bellum edoctos, & canes venandi peritos cæteris anteponunt, quin & famulos curant artibus instituendos, & frequenter in eos plurimam impendunt pecuniam, cum seipsos negligant. Quid, an non turpe videtur, famulum nonnumquam æstimari drachmarum decem millibus, ipsum autem dominum nec vnus haberi drachmæ? Quid autem dixi vnus? Nemo talem vel gratis acceperit in famulitium. An non tandem se solos vilissimos omnium reddiderunt, qui soli nullam artem didicerint? Etenim cum bruta quoque artium exercitationibus erudiant, & famulum ignauum nulliusque peritum artis, nullo pretio dignum indicent: curent autem & agros & reliquas possessiones, ut quæque, quantum fieri potest, sit quam optima, seipsos solos negligant, ne hoc quidem intelligentes, animum habeant necne: perspicuum est, quod similes sint famulis contemptissimis, ut iam aliquis insultans homini tali, meritò verbis huiusmodi illum alloquatur, O homo, familia quidem tua tibi rectè habet, mancipia omnia, & equi & canes & agri, & quidquid possides benè compositum est: at ipse tu parum curatus es. Præclare igitur Demosthenes ac Diogenes, quorum alter diuites indoctos appellauit oues onustas aureo vellere: alter dixit eos similes ficis arboribus in præruptis locis stantibus. Nam harum fructibus non homines, sed coruos & graculos vesci. sic horum pecunias nulli esse vsui viris probis, verum ab

assentatoribus absum, qui quidem si sic acciderit, ut nihil sit reliquum, fortè obuios factos prætereunt: illos quos exhauserunt, perinde quasi ne nossent quidem. unde quidam non inelegans dixit istos similes fontibus. Etenim qui priùs è fontibus aquare solent, simulatque desierint habere aquam, apud eosdem sublati vestibibus urinam reddunt. Et sanè videtur æquum, qui nulla re suspiciendi sunt nisi ob diuitias, simulatque his spoliati fuerint, pariter & illis spoliari, quæ ob diuitias habebant. Quid enim isti facerent, qui nullum proprium possident bonum, sed perpetuo pendent ab alienis, & à rebus fortuitis? Tales videlicet sunt & hi, qui generis nobilitatem venditant, atque hinc sibi placentes tollunt cristas. Nam & isti, quoniam propriis bonis carent, ad maiorum imagines confugiunt: non saltem hoc intelligentes, quòd ista generis nobilitas, qua gloriantur, similis est publico singularum ciuitatum nomismati, quod apud eos quidem valet, qui instituerunt, apud alios verò adulterinum habetur.

22

a Annon te
in altum ge-
neris euexit
decus?

Malum est e-
gere: non a-
lebat me ge-
nus.

a Te haudquaquam in altum generis euexit decus.

Non altus huc sum, polluam ut genus meum.

Præclarus igitur, ut inquit Plato, thesaurus est progenitorum virtutes: sed præclarius est huic opponere posse b Sthenel dictum,

23

b. Stheneli
dictum.

Atqui nos patribus longè præstamus, auisque.

Nam si qua omninò est nobilitaris utilitas, ea sola est, quòd proposito exemplo domestico, hinc accenditur studium imitandi. Proinde si degeneremus à maiorum virtute, meritò discrucientur illi, si quis modò sensus insit defunctis, nobis autem tanto plus est dedecoris, quanto genus est illustrius. Siquidè imperiti qui genere sunt prorsus obscuro, hoc lucrificiunt, quòd plerique nesciunt quales sint. Cæterum quos decus & claritudo generis non sinit latere, quid fructus ferunt ex nobilitate, nisi ut illorum infelicitas sit illustrior? Sanè qui generi suo non respondent, maiore reprehensione digni sunt, quàm obscuro loco nati. Itaque fit, ut si

vecors

vecors prædicet claritatem generis, declaret suum ipsius vitium minus venia dignum esse. Neque enim eadem trutina æstimamus aut exploramus plebeios homines, qua claro genere natos. sed illos, si vel mediocri virtute præditi sint, probamus & amplectimur, quod deest illorum virtuti, generis obscuritati attribuentes. Rursus hos qui nihil habent dignum imaginibus maiorum, etiamsi cæteris omnibus antecellant, nondum tamen suspicimus. Proinde si quis sapit, ad exercendam artem sese conferat, per quam si nobilis fuerit, videbitur genere non indignus: sin minus, ipse genus ornabit suum: veterem illum Themistoclem imitatus, cui cum probro obijceretur, quod nothus esset, At ego, inquit, b à me ipsum genus auspicabor: ac meum quidem genus à me incipiet, tuum verò in te desinet. Vides non obstitisse Anacharsidi Scythæ, quò minus sit in admiratione, & inter sapientes numeretur, tametsi genere barbarus esset. Huic cum quidam exprobraret, quòd genere barbarus esset ac Scythæ, Mihi quidem, inquit, patria dedecori est, tu verò patriæ: ingeniose calumniam retorquens in hominem nihili, nec alia re quàm patriæ nomine gloriantem. Quòd si fixius & attentius contempleris res hominum, comperies non homines factos illustres ex ciuitatibus, sed contrà per viros bonos & artibus præstantes horum patrias fuisse nobilitatas. Etenim quod nomen aut quam dignitatem habuissent Stagira, nisi per Aristotelem contigisset? Rursus quæ Solorum fuisset dignitas, nisi per Aratum & Chrysippum contigisset? Quin & Athenarum nomen vnde tam procul dimanauit? Non ob terræ fecunditatem: habuit enim agros parum feraces: sed per eos potius, qui illic nati sunt, quorum plerique, dum in viros optimos euaserunt, nonnullam suæ gloriæ portionem impertierunt & patriæ. Hoc autem esse verissimum euidentissimè perspicies, si tecum reputes Hyperbolum & Cleonem, quibus ad nihil aliud profuit Athenarum nobilitas, nisi vt illorum maleficia nobilitata magis essent atque testata. Quòdam Bæotios vocabant suos, inquit, Pindarus. Et idem

24.
b. posteris
meis auctor
ero generis,
ac.

25.

26.

27.

a. An effugimus (vetus opprobriū) Bæoticam suam, volēs

28.

29.

b. Cum enim id potissimū tēporis omnis ars exerceri debeat, cum corpora vidētur esse.

c. supra quā mediocrem parasse. Præstat igitur eos intelligere, adolescentiū formam vernis floribus assimilē esse, ut quæ voluptatē habeat momentaneā, simulque.

d. Tū autē aduersus senectutem, egentem non calceamentis solum & vestitu, verum & domicilio commodo, alijsq; rebus innumeris, probi gubern.

31.

32.

rursus, ^a Fugimus Bæoticam suam, volens totius prope gentis de imperitia probrum aboleri per suam poetice. Iam verò & legislatorem illum Atheniensem iure laudari aliquis, qui vetuit parentem alimoniam ius à filio petere, quem nullam artem docuisset. ^b cum id potissimum temporis omnis ars, illic exerceretur, ubi corpora videbantur esse quā formosissima, multis usu venit, ut ob corporis formam admirandi negligerent animum, deinde serò frustra que deplorarent, dicentes, utinam forma quæ me perdidit, pereat malè. Tū illis & illud Solonis in mentem venit, qui iubet in primis spectari vitæ finem. Deinde & senectutem inculant, cum seipsos debuerint: & Euripidem laudant qui dicit, Non expedire pulchritudinem ^c ultra capere quā in medio. Præstat igitur eos laudare qui iudicarunt formam adolescentiæ assimilē vernis floribus, ut qui voluptatem habent temporariam, simulque laudare Lesbiæ dictum, Nam qui formosus est tantisper est dum cernitur: At quisquis bonus est, protinus & formosus erit: parendum autem & Soloni eandem sententiam proferenti. ^d Senectus porro molesta, veluti tempestas imminens, egens non calceamentis solum & vestitu, verum & domicilio commodo, alijsque rebus innumeris. Aduersus hanc probi gubernatoris exemplo, multo antè velut in veteram tempestatem oportet præparari, quādo miserum est illud,

————— Vecors intelligit acta.

Ad quid enim dixeris vtilem esse formam adolescentis nulla excultam arte? Num ad bellum? Atqui non abs re quis illud Homericum in tales iaculetur,

Quin tu coniugij tractas mulcentia facta?

Et illud,

Ito domum, & tracta tibi conuenientia facta, siquidem Nireus

Venerat ad Troiam cunctis formosior vnus,

Verum mollis erat:

Eoque non nisi semel huius meminit Homerus in recensendis

sendis nauibus, haud quidem ob aliud, mea sententia, nisi vt declararet, quàm sint inutiles viri forma præstantissimi, quoties illis præter formam nihil adest, quod ad vsum vitæ conducat. ^a At infelix quispiam dicere non verebitur, ad parandas opes conducibilem esse formam, cum liberalis, honestus firmusque pecuniarum census ex arte parari soleat: cæterum ex corporis forma reditus turpis est semper & infamis. Oportet igitur adolescentem, iuxta vetus prouerbium, suam ipsius formam ad speculum contemplari, qui si se cõspexerit facie pulchra, aduigilandum est vt talis sit & animus, existimetque vehemẽter absurdum, in formoso corpore animum habitare deformem: Rursum si se viderit forma corporis infelici, tanto maiori studio animum excolet, quod dicere possit illud Homericum,

a. Nequẽ
verò ad pa-
randas opes,
quod impro-
bi quidam &
perditi ho-
mines dicere
non veretur,
conducibilis
est forma: cõ

33.

Est alius, cui forma parum sit corpore felix,

Sed comptis formam verbis Deus ornat, & illi

Defixis oculis vultum huius cernere gaudent.

Ille sine offensa loquitur, placido ora rubore

Suffusus, reliquosque foro toto eminet inter,

Vtque Deum aspiciunt, incedit quando per urbem.

34.

Ex his igitur perspicuum est ijs, qui non prorsus mente carent, non esse negligenda artium studia, nec in diuitiis aut formæ venustate, aut denique splendore generis spem esse ponendam rerum nostrarum. Atque hæc quidem sufficiebant. Attamen melius, opinor, fuerit ceu pulchrum epodum accinere Diogenis illud: Is cum apud quemdam acciperetur conuiuio, qui res omnes, quas possidebat, accurata prouidentia nitidas & instructas habebat, cæterum sui ipsius nullam curam habuerat, screans veluti sputum eiecturus, cum vndique circumspexisset, nihil vidit in quod expueret, sed in ipsum solum domus herum expuit. Ille cum indignaretur, rogarẽtque quam ob causam id faceret, respondit se nihil in tota domo tam sordidum ac neglectum videre, quàm esset ipse: nam parietes omnes egregiis picturis ornatos esse, pauimentum autem ex tessellis pretiosis esse con-

35.

cinnatum, deorúmque variis imaginibus distinctum, vasa omnia pura ac nitentia, quin stragulas & lectos pulchrè magnóque artificio elaboratos esse: solum ipsum videri neglectum & incompositum: omnibus autem esse morem, vt in locum omnium, qui adsunt, inhonestissimum expuant. Nec committas igitur adolescens, vt te præbeas dignum, in quem sputum eijciatur, etiamsi reliqua omnia pulcherrima tibi videantur adesse. rarum enim est istis simul vniuersis potiri, vt idem pariter & nobilis sis & diues & formosus. Quòd si tibi sanè simul illa contingant aliquando, tamen absurdum fuerit, te vnum in omnibus tuis facultatibus videri conspuendum. Agite igitur, ô pueri, quicumque audita mea oratione ad cognoscendas artes animum appulistis, videte ne quis vnquam veterator & impostor homo vos aut inutiles artes aut improbas doceat: sed certum vobis exploratumque sit, quibus artibus nullus est propositus finis ad vitam utilis, has artes non esse. Ac planè persuasum habeo de cæteris quidem vos ipsos perspicere, quòd nihil istiusmodi rerum artis nomine sit dignum, veluti ^a iacere talos, ire per extentum funem, & rotatu circumagi in gyrum, non ^b considerantem interim quid acciderit Myrmeciadæ Atheniensi & Callicrati Lacedæmonio. Tantùm Athletarum exercitium suspectum habeo, ne veluti corporis robur pollicens, & gloriam apud vulgus concilians, publicitùs etiam apud maiores diurnis pecuniæ largitionibus honoratum, parique in pretio habitum cum ^c præstantissimis artibus, decipiat aliquem adolescentem, eoque seducat, vt hoc arti cuiuspiam anteponat. Vnde satius est aduersus hæc præparatum ac præmeditatum esse. Nam facilè quisque fallitur in his, quæ non paulo antè præmeditatus secum mente pertractauit. Sanè genus hominum, ô pueri, communionem habet simul & cum Dijs & cum brutis animantibus. Cum illis quidem, quatenus vtitur ratione: cū his verò, quatenus est immortale. Satius est igitur vt animis ad meliorem cõmunionis partem adiectis, curemus eruditionem: quam assecuti, quod est in bonis

36.

37.

a. petauristā
esse, ire.
38.

b. caligantē:
& qualia fuerunt studia
Myrmecidæ
Atheniensis
& Callicratis
Lacedæmonij. Tātūm.

39.

40.

41.

c. præstantissimis viris,
decipiat.

bonis summum habebimus: Sin eam non fuerimus affecuti, non tamen hoc nomine pudescemus, quòd brutis ignauissimis simus facti inferiores. Athletica verò corporis exercitatio, si non contingat affectanti, turpissimum est: si maximè contingat, nihilo tamen præstantior est brutis animantibus. Quis enim robustior leonibus aut elephantis? quis lepore velocior? Quis verò nescit ipsos etiam Deos non ob aliud laudari, quàm propter artes? adèd vt ob has etiam eximios homines dignati simus diuinis honoribus, non quòd benè cucurrerint in stadiis, aut discum scitè iecerint, aut in palæstra probè luctati sint, sed propter beneficium artium. Profectò Æsculapius & Bacchus, siue quondam homines fuerunt, siue Dij, ab initio summos honores promeruerunt: alter ob monstratam artem medendi, alter quòd nos docuerit vitium colendarum rationem. Quòd si mea fidem tibi non facit oratio, certè Pythij Dèi te moueat auctoritas. Hic est ille, qui & Socratem virorum omnium sapientissimum pronunciauit, & Lycurgum affatus, hunc in modum salutat,

Huc aduenisti ad mea ditia templa, Lycurge,

Grate Ioui & cunctis, quibus altus habetur Olympus:

At dubito ànne Deum te dicam hominè me, Lycurge,

Spero tamen magis esse Deum, numénque verendum.

Hic rursus idem videtur honorè haud mediocrem habuisse Archilochò mortuo. Cùm enim huius interemptor vellet illius templum ingredi, vetuit dicens,

Occisor clari vatis, ne templa subito.

Nunc mihi tu refer Athletas huiusmodi titulis honoratos: at non facies, non enim habes quod dicas, nisi fortè testem aspernaris, velut indignum cui credatur. Videris enim tale quiddam subindicare, dum sermonem refers ad vulgi testimonia, & nobis obijcis huius laudationem. Et tamen neque morbo laborans, sat scio, te ipsum vulgo commiseris, sed ex omnibus paucis aliquot, atque his quidem medicæ rei peritissimis: neque nauigans cuius è numero vectorum, sed vni videlicet gubernatori. Denique & in rebus minimis, si

ædificas, fabro credis, si calceamētis egeas, coriario. Quī fit igitur, ut ubi de rebus summis contentio est, tibi vindices iudicandi potestatem, adimens eam his, qui plus sapiunt quā tu? Nam in præsentia quidem omitto de Dijs facere mentionem. Audi igitur quid de Athletis sentiat Euripides:

45.

Innumera cū sint mala per omnem Grāciam,

Haud aliud vllum est peius Athletis genus.

Primū ij domi sibi consulunt parū bonē,

* Cū liceat: etenim quomodo vir qui fiet

Gulæque seruus, atque ventri deditus,

Opes pararet, vnde viueret domi?

Egere rursus non potest, ^b sed nec suis

Contentus esse sustinet fortunulis:

Nam numquam honestis assueti moribus,

Mox sese ad artes improbè vertunt malas.

a Nec liceat.
b. nec ca-
sibus Serui-
re, prauis
nam assueti
moribus,
Sunt durio-
res ad ferēda
incōmoda.

c. utilitatis,
audi.

Iam ut intelligas, & omnia quorum studio tenentur isti, nihil habere ^c bonæ rei, audi rursus quæ dicit, si libet:

Quis enim in palæstra, quis pedum cursu valens,

Feliciter versatus, aut disco bonē

Misso, aut probè scitæque mala ista viri,

^d Patriæ coronam rettulit partam suā?

Quod si cupis audire his etiam expressiora, ausculta:

Nūm aduersus hostes præliabuntur, manu

Discos ferentes, siue vibrata aspide,

Pedibus citi hostem submoueunt patria?

a Nullus profectò: vana fiunt omnia hæc,

Vbi cominus ferrum micare cœperit.

a. Præsente
ferro nemo
tantum desi-
pit.

Vtrum igitur Euripidem & huius generis alios auctores reiiciemus, philosophis autem permittemus iudicandi ius? Imò verò horum omnium suffragio velut vno ore loquētium damnatur istorum ars, ad eò ut eam nec medicorum quisquam probarit. Primū enim audies Hippocratem ita dicentem, Affectio Athletica non est secundum naturam, melior est habitus salubris: deinde optimos quosque medicos, qui Hippocratis ætatem secuti sunt. Equidem no-

lim

lim à testibus pendere iudicium. Nam id oratorum est potius, quàm hominis apud quem in pretio sit ipsa veritas. Atramen quoniam nonnulli confugiunt ad multitudinis approbationem, & hinc inanem captant gloriam, nec curant hoc exercitium rebus externis nudatum, quale sit ipsum considerare, coactus sum, & hinc obijcere testes, quò videlicet intelligant, se ne hinc quidem esse nobis superiores. Vnde mihi non intempestivum videtur cōmemorare, quod fecit Phryna. Hæc cū esset in conuiuio quodam, in quo ludus hic agebatur, ut singuli per vices conuiuis imperarent quæ vellent, vidissetque adesse mulieres, anchusa, cerusa, & fuco pictas, iussit inferri aquam, moxque præcepit ut omnes aquæ immerfas manus semel admouerent ad faciem, deinde ut illico linteo extergentur. Atque hoc ipsa prima omnium fecit. Ac cæteris quidem omnibus fæminis facies maculis opplebatur: diceres te videre quasdam ad terrorem arte factas imagines. Ipsa verò pulchrior apparebat quàm antea: sola enim carebat artificio formæ, sed speciem habebat natuiam, non ad formæ commendationem malas artes adhibens. Quemadmodum igitur vera pulchritudo certò exploratur ipsa per se sola, rebus omnibus foris accidentibus nudata: sic & Athletarum exercitationem expendi conuenit solam, an videatur aliquid vtilitatis afferre vel publicè ciuitatibus, vel priuatim ijs, à quibus exercetur. Cū igitur variæ sint bonorum species, quæ insunt natura, puta quæ pertinent ad animum, quæ ad corpus, quæ ad externa, nec præter hæc vllum aliud bonorum genus possit excogitari: cuius perspicuum est, quòd Athleticam exercentes animæ bona ne in somnis quidem assecuti sint, quando prorsus illud ignorāt, an habeāt animā, tantū abest ut illam sciāt esse rationis participem. Etenim, cū semper aggerāt vim carnis & sanguinis, habent animam suam veluti multo immersam cæno, ut nihil exploratum cognitūque habeat, verū non minus stupida sit quàm brutorum animæ. At fortassis contendunt Athletæ, tanquam a aliquid cōferant ad

47.

48.

a. aliquod ex
bonis corpo-
ris adepti
sint.

49.

b. habitudi-
dinem peric.

50.

c. & impi-
grum esse ad
labores, lau-
datur.
d. senis illius.

51.

52.

53.

54.

55.

56.

d. vniuersum
ac.

e. nimium,

57.

bona ^a corporis. Num igitur bonam valetudinē, qua nihil pretiosius, sibi vendicabunt? Atqui non alios reperias corporis affectione magis periculosa: siquidem Hippocrati fides habenda, qui dixit summē bonam corporis ^b valetudinem periculosam esse, quam affectant isti. Quin & illud ab Hippocrate rectē dictum, quod sanitatis studium est, non satiari cibis, ^c sed in omnibus agilem esse, laudatur ab omnibus. At isti contrā faciunt, dum & supra modum laborant, & ijdem supra modum explentur. In summa ^d veteris illius Hippocratis sermonem, ceu Corybantum furore correpti, contemnunt. Nam ille demonstrans quæ vitæ ratio sit accommodata tuendæ bonæ valetudini, dixit, Labores, cibi, potus, somni, venus, omnia moderata. Isti verò quotidie suprā quā conuenit, laboribus exercentur, & ingurgitant se nonnumquam è vi, & ad mediam vsque noctem producunt comestationes, vt aliquis non immerito torserit in illos illud Homeri,

Dormibant reliqui Diuique hominēsque per omnem Noctem, prædulci resoluti corpora somno:

At nullus miseros Athletas somnus habebat.

Itaque quæadmodum se habent in cibis & laboribus, eodem modò moderantur, & somnum. Etenim quo tempore cæteri iuxta naturam viuentes ab opere veniunt, & cibum requirunt, tūm isti surgunt à somno: vt illorum vita similis videatur suillæ: nisi quod sues non vltrā modum laborant, neque coguntur ad edendum: Isti verò & hæc faciunt: & nonnumquam iisdem Rhododaphnis terga perstringuntur. Proinde priscus ille Hippocrates, præter hæc quæ dicta sunt, addit & illa, ^e vehementer ac repentē corpus explere vel inanire, vel calfacere vel refrigerare, aut alio quocumque modo mouere, periculosum est. Quicquid enim, inquit, est ^e vehemens, inimicum est naturæ. Isti verò nec his auscultant, nec alijs quæ benè ab hoc dicta transgrediuntur: quin potius vtuntur omnibus, quæ pugnant cum his præceptis. Quapropter ego sanè dixerim istud vitæ institutum

non

non esse sanitatis, sed morbi potius studium. Nam id, ni fallor, sentit Hippocrates, cum ait, Affectio Athletica non est secundum naturam, sed ^a habitudo salubris melior. His dictis non solum palam negavit illorum exercitationem esse naturalem, verum ne ^b habitudinem quidem appellavit illorum affectionem, spolians illos etiam nominis honore, quo cuncti veteres appellare solent homines, qui verè essent bonæ valetudinis. Siquidem habitus est affectio quædam stabilis ac perpetua: contrà, Athletarum ad summum progressa bona corporis habitudo, tum obnoxia periculo est, tum faciliè in diuersum mutabilis. Neque enim recipit accessionem, eò quod ad summum peruenit, tum ex eo quod eodem in statu consistere non potest, nihil restat, nisi ut vergat in deterius. Atque hoc quidem in statu corpus est ipsis dum Athleticam exercent. Cæterum ubi discesserint ab exercitijs, multo peius habent. Etenim nonnulli paulo post emoriuntur: alij verò diutius quidem viuunt, at ne ipsi quidem perueniunt ad senectutem. Et ut iam aliquando perueniant, nihil differunt à Litis Homericis,

- Claudij, rugosi, lusciosi, oculis orbi.

Quemadmodum enim mœnia tormentis concussa quouis incommodo corruunt, nec terræ motum, nec alium vllum grauiorem insultum ferre possunt: itidem & Athletarum corpora attrita atque conuulsa plagis ac vulneribus in arena acceptis; faciliè ad quamlibet leuem occasionem læduntur. Proinde oculi plerumque ceu fossis cauati, quando iam vis abest resistendi, complentur ^c pituita, dentes verò utpote frequenti concussione labefactati, progressu temporis destituti virtute, faciliè decidunt. Cæterum ^d membrorum cōpages, ut frequenter intortæ, aduersus omnem violentiam foris incidentem redduntur inualidæ: ^e quicquid semel ruptum fuit aut contractum, faciliè mouetur. Itaque quod ad bonam valetudinem attinet, palam est nullum esse genus miserius quam Athletarum. Vnde non iniuria quis

58.
a. habitus
sal.

b. habitum
quidem.

59.

60.

61.
c. destillati-
onibus, den.

d. articu-
lorum comp.

62.
e. quævisrup-
tio ac neruo-
rum diuul-
sio faciliè ex-
citatur.

eos appposito cognomine vocatos dixerit Athletas, vel quodd ab Athleta cognomen habeant ἄθλιοι, id est, miseri, vel quodd vtrique communiter ab ἀθλιότητι, id est, miseria, velut ab ^a vna terra cognomen sortiti sint. Posteaquam igitur de eo, quod inter bona corporis summum est, tractauimus, nimirum de bona valetudine, transeamus ad reliqua. Iam quod ad formam attinet, sic illis habet res, vt non solum exercitatio Athletica nihil conferat ad pulchritudinem, verum etiam multos ex istis optimè composito corpore gymnastæ, qui eos curandos susceperant, supra modum saginantes & infarciētes carnibus & sanguine, in diuersam corporis speciem perduxerint: nonnullos quoque facie prorsus deformi fædæque reddiderint, eos potissimum quos ad pancratium aut pugilum certamen instituissent. Cæterum vbi tandem & membrum aliquod fregerint, aut distorserint, aut oculos extuderint, tūm opinor, tūm vel maximè fructus artis ipsorum euidenter apparet, videlicet pulchritudo. Hunc ad modum illis res successit ad formæ commodum, quādiu sani sunt. Cæterum vbi desierint exerceri, simul & reliqua sensuum corporis organa pereunt, cūctaque, vt dixi, membra distorta nihil non reddunt deforme. At fortassis nihil quidem ex omnibus his, quæ dicta sunt, sed robur sibi vindicabunt. Nam hoc, scio, dicturi sunt, vnum illud esse omnium efficacissimum. Quod per Deos robur? aut ad quid vtile? Num ad agricolationem? Perpulchrè igitur vel fodere vel metere, ^b aut aliud quippiam, quod ad agricolationem pertinet, possunt. Sed fortassis ad res bellicas valet. Rursus Euripidem huc mihi cita, qui laudes illorum canit his verbis,

Num aduersus hostem præliabuntur, manu

Discos ferentes? num ve vibrata aspide

Pedibus citi hostem submoueunt patria?

^c Nullus profectò: vana sunt omnia hæc,

Vbi comminus ferrum micare cœperit.

Cæterum aduersus rigorem & æstum validi sunt, hoc ipso sanè

63.
a. vno fonte
cognomen.

64.

65.

66.
b. vel arare,
aut aliud.

c. re vera
nemo hæc
stultè desi-
gnat, vbi.

sanè Herculem referentes, vt tum hieme tum æstate vna pelle tegantur: vt incalciati perpetuò sub dio dormiant, humi cubantes. ^a In his enim omnibus pueri nuper nati sunt imbecilliores. Qua tandem igitur in re roboris suispecimen edent? aut vnde sibi placebunt, & cristas erigent? Non sanè in hoc quod coriarios, fabros, domorum ædificatores vel in palæstra deiiciant, vel in stadio. Fortassis itaque in hoc quòd toto die puluerescunt, meritò sibi gloriandum putabunt. Verùm ista laus adest & coturnicibus & perdicibus, siquidem par est, vt hinc tollant cristas, quòd toto die luto lauentur. Sed age per Iouem, Milo ille Crotoniates sublatum in humeros vnum ex immolatis tauris olim per stadium baiulauit. O insignem dementiam istorum, qui ne hoc quidem intelligunt, quòd paulo antè idem corpus viui animantis gestarit illius anima: multoque sanè minore labore portauit, quàm Milo. Nam & currere poterat cùm gestaret: attamen ea nullius erat pretij, quemadmodum nec Milonis anima. Declarauit autem & exitus hominis, quàm nihil habuerit mentis. Cùm enim aliquàdo conspiceret adolescentem cuneis immisissis findentem ligna, illum quidem irrisum submouit, ipse non alio vsus instrumento quàm suis ipsius manibus, ausus est lignum diducere. Mox quicquid habebat roboris, in primo impetu colligens, deduxit arboris huc atque huc partes. Interim elapsis cuneis cùm reliquam arboris partem diducere non posset, diu quidem obnixus est, tandem victus non potuit educere manus, sed à trunci partibus in sese coëuntibus comprehensæ, primum ipsæ quidem contritæ sunt, mox & Miloni miserandi exitij fuere causa. Plurimum igitur illi profuit in hoc, ne quid mali pateretur, in stadio gestare tauro mortuum. An Græcorum Rēpublicam seruare potuisset id tēporis, cùm aduersus barbarum bellum gerebant, Milonis vis quam in gestando tauro declarauit, potius quàm Themistoclis sapientia, qui primum recto iudicio ^b depræhendit sententiam oraculi, deinde bellum, quemadmodum oportet.

67.

a. At enim in his omnibus pueris nuper natis sunt.

68.

69.

b. interpretatus est oraculū, deinde.

tebat, gessit. Vnicum enim consilium prudens multas superat manus. Cæterum inscitia cum armis peior est quouis malo. Arbitror itaque iam perspicue declaratum, Athletarum exercitationem nihil utilitatis asferre ad vitæ functiones. Cæterum quod nec in ipsis quibus exercentur, ullius pretij sint, cognoscetis, si vobis retulero fabulam illam quam vir quidam non inelegans prolixo carmine ornauit. Habet autem hunc in modum fabula:

- Si Iouis voluntate cunctis animantibus consensus ac societas contingeret in degenda vita, ut in Olympia præconon solum homines ad certamen vocaret, sed omnibus etiam animalibus permetteret ad vnum venire stadium, nullus opinor hominum coronaretur. In eo certamine, in quo cursus ad viginti tria stadia porrigitur, vnde & δολιχὸν appellant, equus, inquit, longè superabit: in cursu verò breviori, qui non ultra stadium profertur, lepus feret præmium. Cæterum in diaulo, in quo cursus ac recursus duplicat stadium, primas feret caprea. Neque quisquam hominum in aliquo numero futurus est^b. O leues exercitationes vestras ἀλλοι, id est, miseri viri. Imò ne Herculis quidem posterorum quisquam elephanto aut leone robustior apparebit. Arbitror autem futurum, ut & in pugilum certamine taurus coronam laturus sit. Et asinus, inquit, si velit calcibus contendere coronam auferet. Et in historia variorum euētuum scribetur, quod asinus in pancratio aliquando vicerit viros. Erat autem Olympias prima ac vigesima cum vinceret ruditor. Admodum venusta fabula hæc declarat, robur Athleticum non esse de numero eorum, quibus homines decet exerceri. Atqui si ne robore quidem antecellunt animantibus Athletæ, quodnam ex cæteris bonis sibi vindicabunt? Quod si quis dicat voluptatem corporis inter bona numerandam, ne huius quidem compotes sunt, neque cum exercentur, neque postquam ab exercitatione discesserint: quandoquidem dum exercent Athleticam, in laboribus ac miserijs agunt, non tantum ob exercitia, verum etiam ob id

b. futurus est cursu pedum, o leues.

ob id

ob id quòd coguntur ad edacitatem. Quòd si contigerit eos ab arte missionem accipere, plerisque corporis membris mutili fiunt ac debiles. Ergo fortassis inde gloriantur, quòd præ cæteris plurimum colligunt & coaceruant pecuniarum. Atqui videre licet istos omnes ære alieno obstrictos, non solum id temporis quo exercēt artem Athleticam, verū etiam cū ab ea dimissi sunt, nihilo inuenies Athleticam ditiorē quouis viri diuitis æconomo. Quanquam ne id quidē per se præclarum est ex arte parare diuitias, sed talem potius artem scire, quæ fracta naui simul cum domino enatet è naufragio. Quod quidem nec his contingit qui res procurant diuitum, neque publicanis, neque negotiatoribus, & tamen hi maximè ditescunt è suis artibus. Cæterum si pereant illis pecuniæ, simul perit & negotiatio, ad quam opus quidem habēt aliqua sorte pecuniæ. Cæterum si hæc desit, nō possunt instaurare pristinam negotiationem. Nullum enim illis mutuū credit absque pignoribus & hypothecis. Proinde si quis vestrū studet viam rationemque inuenire ad parandas pecunias & tutam, nec infamem, ars aliqua exercenda est per omnem vitam permanens. Porro cū prima diuisione in geminum discrimen artes distribuuntur, quædā enim ex his ratione constāt, suntq; liberales & honestæ: quædā cōtrā contēptibiles, quòd corporis laboribus consistunt, quas sedentarias ac manuiarias vocant. præstiterit ex illo priore genere quampiam discere: nam posterius illud genus destituere solet senectute grauatos artifices. Prioris autem generis sunt Medicina, Rhetorica, Musica, Geometria, & Arithmetica: Dialectica, Astronomia, Grammatica, ac legum prudentia. Adde his si voles, fingendi pingendique artificium: quanquam enim hæc manuiaria constant opera, tamen earū exercitatio non eget robore iuuenili. Ex his igitur artibus, aliquam deligere conuenit, & exercere iuuentutē, cui mens non sit omnino hebes ac rudis, vel harum potius optimam, quæ quidem mea sententia est ars medendi. Hoc autem deinceps nobis erit demonstrandum.



FED. IAMOTII MEDICI AN-
NOTATIONES IN GALENI
exhortationem ad artium libe-
ralium studia.



N ANIMANTIA quæ dicuntur
bruta.) Duplex est Aristoteli *φαντασία*,
id est, visio siue imaginatio, altera *λογιστική*,
hoc est rationis, altera *αἰσθητική*, id est,
sensus particeps. Ac visionem quidem,
quæ consilij est, in ijs reperiri ait, quæ ratione
vtuntur: eam autem quæ sensum attingit,
in alijs etiam animalibus, sed in quibusdam expressiorem, in alijs
imperfectiorem. Quæ visorum efformandorum vis quoniam cum
ratione similitudinem quandam habet, accidit vt quibus belluis
hæc expressior inest, ijsdem rationis & prudentiæ quædam imago
à natura data esse videatur. Hoc tamen inter hominem & belluam
interest, quòd ille ex visorum comparatione, notionem vniuersam
colligit, in qua principium est intelligentiæ: hæc visis regitur, nec
ea animi parte, quæ rerum singularum imagines recipit, quic-
quam habet perfectius. Quanquam sunt, qui ex Galeno arbitra-
tur priorem vim etiam belluis inesse, easque connatas rerum spe-
cies vniuersas habere, per easque accidere, vt pullus miluum me-
tuat, quia insitam habet milui speciem, ad quam singulos, cum
sensibus obijciuntur, solet referre. Plutarchus peculiari com-
mentario probat, multis argumentis animalia bruta vi ratione.
Pythagoras autem & Plato ratione quidem præditas esse brutorum
animas volunt, non tamen ratione agere, tum propter corporum
δυσκρασίαν & intemperiem, tum etiam quòd sermonis facultate
careant. Horum opinionem secutus est Virgilius lib. 4. Georg.

I.

Lib. 3. de
animo.Lib. 2. meth.
med.

*His quidam signis, atque hæc exempla secuti,
Esse apibus partem diuinæ mentis, & haustus
Æthereos dixere: Deum namque ire per omnes
Terrasque, tractusque maris, calumque profundum.
Hinc pecudes, armenta, viros, genus omne ferarum.
Quemque sibi tenues nascentem arcessere vitas.*

*Quem locum plenius explicat lib. 6. Æneid. Principio calum
ac terras. &c.*

2. *Quæ iuxta vocem intelligitur.) Plutarchus commentario,
Quòd oportet philosophum cum principibus versari, duplicem ra-
tionem facit, unam τὸν ἐντρίχον, id est, interiorē, quam mentis
conceptum vocant, omnibus animalibus communem, alteram
τὸν ἑξωτερικὸν vel τὸν ἐν ἑξωτερῇ, id est, in pronuntiatione
sitam, solique homini propriam. Quanquam Porphyrius libro de
abstinentia animalium, belluas non rationis modo, sed cuiusdam
etiam siue sermonis siue locutionis participes esse scribit, cuius intel-
ligentes dicuntur fuisse cum plerique alij, tum Melampus, Tire-
sias, & Apollonius Tyaneus.*

3. *Quanta sit artium multitudo.) Ratione non agere bruta ani-
malia, vel hinc apparet, quòd ratio in varietate rerum cernatur. Ara-
neus autem texendæ tantum telæ peritus est, ficedula canendi, apes
mellificandi, neq; quicquam præterea agere possunt. Ratione igitur
non agunt. Homo autem ut natura nullam artem sortitus est, ita facul-
tatē habet ad omnes artes intelligendas: vult enim Aristoteles intelle-
ctum nostrum, quādo primum cum corpore coniungitur, esse ut ta-
bulam prorsus nudam, & in eo similem materiæ primæ, quòd ut
hæc nullam habet ingentam formam, sed tantum insitam facul-
tatem ad omnes rerum naturalium formas perpetua vicissitudine
recipiendas: sic ille nullam omnino formam habeat intelligibilem
siue notionem secum ingentam, sed solam facultatem ad omnes no-
tiones recipiendas. Præterea Galenus nullam idcirco artem homini
à natura datam esse ait, quòd cum deberet esse omnibus artibus
ornatum: atque ut corpus armis nudum, sic & animum artibus
destitutum habere. Ideoque pro corporis nuditate, manus, pro ani-
mi inertia & imperitia rationem accepisse, quorum usu & corpus
armaret*

armaret, & animum omnibus ornaret artibus. Proinde rationem vocat $\pi\epsilon\chi\lambda\omega\ \tau\acute{\iota}\nu\alpha\ \pi\epsilon\delta\ \pi\epsilon\chi\omega\acute{\nu}$, hoc est, artem quandam ante artes; Aristotelis exemplo, qui manum esse dicit, $\epsilon\gamma\chi\acute{\alpha}\nu\ \tau\iota\ \pi\epsilon\delta\ \epsilon\gamma\chi\acute{\alpha}\nu\alpha\upsilon$, id est, instrumentum quoddam ante instrumenta: Ut enim manus omnia particularia instrumenta recipere potest, quanquam nullum sit ex ijs: sic etiam ratio, tamen si nulla sit ex artibus particularibus, ad omnes in se recipiendas apta est & idonea.

Lib. 10. de partibus animal.

4. Quinetiam his ipsis natura magis.) $\phi\upsilon\sigma\iota\varsigma\ \zeta\omega\alpha\ \alpha\ \lambda\iota\sigma\tau\epsilon\chi\epsilon\iota$, inquit Hippocrates, Natura animalium à nullo sunt edocta. Animalia autem bruta nec arte, nec inuestigatione, nec deliberatione adhibita quicquam facere, sed sensu naturæ, cuius impetu reguntur, docet Aristot. lib. 2. Phys. cap. 8. Vergilius item lib. 1. Georg. Haud equidem credo, quod sit diuinitus illis Ingenium, aut fato rerum prudentia maior.

Lib. de alimento.

5. Quàm instituto.) $\eta\ \pi\epsilon\chi\alpha\iota\sigma\iota\varsigma$, quàm proposito, consilio, electione. $\eta\ \pi\epsilon\chi\alpha\iota\sigma\iota\varsigma\ \delta\eta$, inquit Aristoteles, $\epsilon\chi\omega\sigma\iota\sigma\iota\upsilon\ \mu\epsilon\lambda\acute{o}\ \phi\alpha\iota\upsilon\tau\alpha\iota$, $\omicron\upsilon\ \tau\alpha\upsilon\tau\acute{o}\nu\ \delta\epsilon$, Electio res videtur esse quidem voluntaria, sed tamen non idem est quod voluntarium. Nam quod voluntarium est, patet latius. Eius enim quod libenter fit, & pueri sunt & belluæ participes: consilij non sunt, nec electionis.

6. In arte texendi imitatus est araneas.) Dicebat Democritus nos animalium summis in rebus esse discipulos, araneorum texendo, hirundinum adificando, cygni lusciniæque modulando carmine, & Voce fingenda, medicamentorum usu, mustellæ, cum serpentem glutini, ruta insuper vorata. Vide Plutarchum lib. de industria animalium.

7. Verùm & ea quæ subter humum sunt.) Animus humanus res inter se situ longissimè seiunctas una intelligentia cōplectitur, ea nempe quæ subter humum sunt, id est, metalla e terræ visceribus effodi & erui solita perscrutans, & celestium atque diuinarum rerum naturam comprehendens. Cæterum non extat Pindari liber, ex quo hic locus petitus est.

8. Fortunæ nos ipsos committere.) Merito taxatus est & libris & scholis omnium philosophorum Theophrastus, quod in Callisthene laudaret illam sententiam, Vitam regit fortuna, non

sapientia. Quanto rectius Democritus, cum fortuna ipse minaci Mandaret laqueum, mediumque ostenderet vnguem? ut inquit Satyricus. Porro quæ ad Fortunæ figuram pertinent, studiose descripsit Cebes Thebanus philosophus, cuius etiam hodie extant dialogi, quibus ille duplicem humanæ vitæ speciem in tabula quadam ob oculos ponit.

9. Basim figuræ sphaeræ.) Spherica figura omnium est maximè volubilis, minimèque stabilis ac firma. Proinde Fortunæ tribuitur propter ipsius inconstantiam & leuitatem: tribuitur & calo volubili & in orbem incitato, quod ad hunc motum orbicularem & mundi volubilitatem, nulla sit ex omnibus aptior figura quàm globosa. Addit & alteram rationem Aristoteles, nimirum rationi consentaneum esse, ut caeleste corpus, quod omnium primum est, figura omnium perfectissima conformatum sit atque insignitum. Perfectissimam omnium esse figuram globosam vel hinc apparet, quod nihil ei addi possit, cum ab vna tantum extremitate atque superficie vndique claudatur. Qualis autem est in solidis globus, talis est in planis figuris circulus.

10. Est autem hilari vultu.) Veteres eam potissimum ob causam Mercurij statuam pone Gratiarum simulachra collocare solebant, quod gratiam & fauorem præcipue desideret sermo, ut sibi conciliet hominum animos. Auctor Plutarchus in libello de Auditoris officio.

11. Quatuor angulis nitens tessera.) Cubus siue tessera Euclidi est figura ex omni latere quadrata, quam Pythagoras & Plato in Timeo tribuunt terræ, propter immotam ipsius stabilitatem. Vide Plutar. extremo commentario de primo frigido.

12. Videbis & Cræsum.) Opulentia Cræsi Lydorum Regis in prouerbum abiit, præsertim nobilitata dicto Solonis, de quo Iuuenalis, Et Cræsum quem vox iusti facunda Solonis Respicere ad longæ iussit spatia vltima vitæ. quæ sententia expenditur ab Aristotele lib. 1. Ethicorum, cap. 10.

13. Polycratem Samium.) Polycrates Samiorum tyrannus, opibus & felicitate apud historicos insignis, annulum habuisse

habuisse fertur incredibilis pretij, sibi que charissimum, quem, ut nimis blandientem fortunam temperaret aliqua aduersitate, in mare abiecit. Eum tamen postea in ventre piscis inuentum recuperavit. Huic, quoad vixit, nihil aduersi contigisse fertur. Sed mors infamis & arumosa docuit, neminem ante obitum merito dici posse felicem. Fuit enim ab Oronte Satrapa Persarum captus suspensusque. Vide Herodotum in Thalia, & Strabonem lib. 14. Huius item meminit Tullius libro quinto de finibus bonorum & malorum. De Cyro Persarum Medorumque Rege à Tomyrade Massagetarum regina capto & interfecto, multa Herodotus lib. 1. multa quoque Iustinus, Xenophon, & Diogenes Laertius.

14. Dionysium Corinthi) Dionysius tyrannus regno expulsus, Corinthi ludum literarium aperuit. Hic cuidam dicenti, Quid tibi Plato & philosophia profuit? Ut tantam, inquit, fortuna mutationem facile feram.

15. Monumentorum perfores.) Tanta fuit apud veteres sepulturae religio, & sepulchrorum immunitas, ut legibus duodecim tabularum poena capitalis constituta fuerit violatoribus sepulchrorum. Itaque probro datum est Romanis principibus, quod suffossus Corinthiorum monumentis, ara Corinthia sustulerint: ipso etiam vocabulo rei turpitudinem exprobrante. Nam ad eum sublata modum, *καποκοίνωσις* dicta sunt. Vide Strabonem, Lib. 8. & Calium, Lib. II. cap. 60.

16. Literatores.) Differt Grammaticus à Grammatista, ut literatus à literatore: tanquam Grammaticus absolute & perfecte doctus sit: (Grammatici enim sibi de omni genere scriptorum diiudicandi sumebant potestatem, unde etiam à veteribus Critici dicti sunt) Grammatista verò, siue literator, mediocriter eruditus. Vide Suetonium in libello de claris Grammaticis. Grammaticos tamen interdum literatos vocari, auctor est Messala Corvinus, id est, poetarum interpretes, quo modo vocat Catullus Syllam literatorem, id est, poetarum interpretem: Ad Calium, Munus dat tibi Sylla literator.

Cicero. r.
Tuscul.

17. Ad Deum communem vertant oculos.) *Legendum* κοινόν, non κοινόν, *ut ad Deum referatur. Vide proverbium, communis Mercurius, & ἑπὶ θεῷ, id est, Sequere Deum, quod est, Obtempera rationi, auctore Plutarcho in libello de audiendo.*

18. Aristippus igitur.) *Idem refert Vitruvius lib. 6. de Architectura, addens Aristippum tunc venisse Rhodum. Alij hoc dictum Antistheni tribuunt.*

19. Quis Oedipum vagantem.) *Verba sunt Oedipi extorris & exulis, & Tragœdia Sophoclis Oedipo Coloneo. Oedipus enim simulatque cognovit se & parricidam esse & cum matre consuetudinem habuisse, sibi oculos eruit, réque cognita eius loci incolis, ab ijs vrbe expulsus est. Qui in exilium abiens, Colonom, qui locus est editus non procul ab Athenis, commigravit. Vnde Sophocles Tragœdiam de Oedipi calamitatibus conscriptam, Oedipū Coloneum appellavit.*

20. Oves onustas aureo vellere.) *Ovium ingenium, ut ait Aristoteles, simplex ac stultum est, & omnium quadrupedum inertissimum, cum & interdum in loca deserta propeat nulla de causa, & sæpenumero septis egrediatur foras, ibique à niuibz occupatum pereat, nisi pastor adducto mare, compellat illinc exire.*

21. Publico singularum civitatum nomismati.) *Cum ante procusum nomisma homines mutuo permutationis commercio uterentur, postea lege introductus est usus nummi, ἀπὸ τοῦ νόμου, id est, à lege dicti, qui & nota publica signabatur, ut apud Romanos ovium ac boum effigie: apud Athenienses, noctua & facie Minerva. Quod declarat Plutarchus in Vita Lysandri, cum serui cuiusdam meminit, qui domini sui furtum ἀνιχνεύσεως indicans ait, Multas sub tegulis cubare noctuas, ostendens illic abditas pecunias noctuis insignitas.*

22. An non te in altum generis evexit decus?) *Versus Euripidis in Phanissis, quos citat Plutarchus extremo libro de exilio. Sunt autem verba Iocasta Polymicen commonentis, quod ex natalium splendore, quamvis exul, regis nuptijs dignus habitus sit, tantisque viribus & amicorum auxiliariis copijs suffultus, expeditionem fecerit, quantis paulo post ipse fateatur. Cui contra*

Polynices

Lib. 9. de
natura ani-
malium.

Plinius lib.
18. cap. 3.

Polynices, *Malum est, inquit, egere: non aluit me genus. Accusat enim exilium, ut potè quod & consanguineis sit contemptui, & amicis careat. Prior versus cum interrogatione legendus est: in posteriore legèdum, καὶ τὸ μ' ἔχον, pro μὲν ἔχον, per apharesin.*

23. *Vt inquit Plato.) In Menexeno. Σθένιδος autem legendum non Σθενῖδος, ex A Iliados, unde hic versus desumptus est.*

24. *At ego, inquit.) Legendum Græcè, ἀλλ' ἐγὼ τοῖς ἀν' ἐμοὺ, ἔφη, ἀρξάτω ἔνως, At ego posteris meis auctor ero generis. Aliter apud Ciceronem in Catone maiore Themistocles Seriphio cuidam in iurgio respondit: Nec hercule, si ego Seriphiius essem, nobilis essem: nec si tu Atheniensis esses, clarus unquam fuisses. Vide Plutarch. in Themistocle.*

25. *Quin & Athenarum.) Thucydides initio historiæ docet Thessaliam, Bœotiam, & Peloponnesum, propter bonitatem solitum seditionibus, tum alienigenarum insidijs fuisse obnoxias: cōtrà Atticam ob solitennitatem diutissime expertem seditionis permanfisse, & ab iisdem semper hominibus fuisse habitatam. κρηναῖς δὲ Ἀθηνῶν, hoc est, sterilibus in Athenis, inquit Pindarus.*

26. *Hyperbolum & Cleonem.) homines improbiſsimos atque scelestiſsimos, quorum ille vitio linguæ petulantissimus fuit: hic ex coriario creatus dux exercitus, victoriam reportauit capta Pylo, suamque ipsius ciuitatem furto spoliauit. Atque ad eum modum ad summas opes euectus, tandem ab alio expulsus, poenas dedit suæ improbitatis.*

27. *Quondam Bœotos vocabant suos, inquit Pindarus.) Citatur à Pindari interprete hic versus ex Dithyrambis Pindari hoc modo, ἢ ὅτε οὐκ ἔστιν τὸ Βοιωτικὸν ἔθνος ἄλκιρον: cuius prouerbij originem vide apud eundem interpretem, & Erasmus in adagio, Bœotica sus.*

28. *Quin & legistatorem illum Atheniensem.) Solon uenit Athenis parentem alimonix ius à filio petere, quem nullam artem docuisset. Lycurgus autem apud Lacedæmonios instituit, ut quisquis ciuium, institutionem puerorum negligeret, ciuitatis iuribus priuaretur. Auctor Plutarchus in uita Solonis, & in institutis Laconicis.*

29. Cum enim id potissimum temporis.) *Legendum puto Græcè, τέχνης γὰρ ἀπώσας* : & paulo post, τῶ γὰρ λαιδοῦσινται, non λαιδοῦσιντας, id est, senectutem incusant.

30. Vecors intelligit acta.) *Sumptū ex Homero Iliad. π & v. Eodem pertinent sententiæ illæ prouerbiales, Malo accepto stultus sapit, Piscator ictus sapiet, &, Serò sapiunt Phryges.*

31. *Quin tu coniugij tractas mulcentia facta.*) *Verba sunt Iouis ad Venerem Iliad. ε, quibus illi rebus bellicis interdicit, ut nihil ad eam pertinentibus : nuptiaras autem & geniales eam curare iubet.*

32. Ito domum, & tracta.) *Verba Hectoris ad Andromachen Iliad. ζ. monentis eam, ut domestica curet, neque rerum bellicarum ad solos viros pertinentium satagat. Quod de Nireo addit, sumptum ex Iliad. 6. in Catalogo nauium.*

33. Iuxta vetus præceptum.) *Socratis videlicet, cuius meminit & Plutarchus in præceptis connubialibus. Huic non absimile est, quod Diogenes Cynicus respondit adolescenti cuidam insigni forma, fœdum quiddam atque obscœnum dicenti, Ex eburna vagina plumbeum gladium educis.*

34. Est alius cui forma parum sit corpore felix.) *Verba sunt Ulyssis ad Euryalum, Odyf. θ. qui Ulysses dietheris incessens prædoni & nautæ comparauerat. Succenset ergò Ulysses importuno Euryalo, docetque Deos hominibus dotes variè distribuere, atque his quidem formam parum felicem elargiri, sed eloquentia & dicendi vi ornatam : illis verò formam corporis egregiam, sed sine doctrina & eruditione. In Homero legitur, ἄλλος μὲν γὰρ τ' εἶδος. &c.*

35. Ceu pulchrum quendam Epodum.) *Epodus propriè carmen minus est, quod post duo maiora strophen & antistrophen in hymnis Deorum stantes ante aram caneant. Hæc enim trias orbibus Lyricorum familiaris est : strophe siue conuersio, cui ex altera parte respondet antistrophe, id est, reuersio. quibus ἐπῶδός sua accinitur. Dicuntur etiam ἐπῶδδι versus breuiores, qui longioribus alternatim subiiciuntur, quorum inuentionem Archilochus tribuit Vindex, quem imitatur in Epodis Horatius. Hoc autem Diogenis factum, quod tamen alij Aristippo tribuunt, ut ait Laertius lib. 2.*

pulchrum

pulchrum quendam Epodum appellat Galenus, quia eo concludit, spretis rebus fortuitis, liberalium artium studia ab adolescentibus esse excolenda. Eodem modo nomen ἐπωδὸν traduxit ad extremum suum librum de Usu partium, qui quoniam tot ac tanta perfecti operis commoda explicat, in eoque consistit, ab eo ὡς περ ἀγαθός τις ἐπωδός, id est, velut bonus quidam Epodus appellatur.

36. Quibus artibus nullus propositus est finis ad vitam utilis.) Nam omnis ars, omnis doctrina, omnis actio, omne studium & institutum ad bonum aliquod refertur, ut ait Aristoteles initio libri primi Ethicorum: ubi notandum, bonum & finem conuerti, hoc est, alterum pro altero sumi: ut idem docet lib. 4. Metaphys. cap. 2. & Galenus lib. ad Thrasybulum, quo querit, Vtrum medicina an gymnastica sit tueri valetudinem, ubi & hunc locum fusius explicat.

37. Veluti Petauristam esse.) Legendum puto πεταυρίστῃν, non πεταυρίστην. Petaurista, teste Nonio, dicebantur à veteribus, qui saltibus leuioribus mouerentur, à verbo πεταῖσαι, quod est volare. Festus à petauro appellatos esse dicit. Est autem petaurum machina lignea, qua homines rotarum pulsu per aera iactabantur. Martialis lib. II. Quàm rota transmissio toties impacta petauro. Et Iuuenalis Satyra 14.

An magis oblectant animum iactata petauro Corpora?

38. Non caligantem.) Legendum, οὐ σκοτεινόν. Σίως, Vertigo est, σκοτεινός, tenebricosa vertigo, cum caput circumagi videtur, & tenebræ oculis obuersantur. Viraque affectio fit ab inordinata spiritus flatuosi crudique motione.

39. Et qualia Myrmeciadae Atheniensis & Callicratis Lacedæmonij opera fuere.) Scribendum, οἰκτε. Fuit autem Myrmeciadæ, siue, ut Plinius, Myrmecides, insignis sculpendi eboris artifex, qui quadrigam ex ebore confecit tam minutam, ut muscæ alis cum agitatore tegeretur: & nauim, quam apicula pinnis absconderet. De quo Tullius lib. 4. Acad. quæst. ut etiam inter Deos Myrmecides minutorum opusculorum fabricator fuisse videatur. Callicrates itidem sculptor, formicas & id genus animalcula minora tam parua fecit ex ebore, ut earum partes cerni non possent. Vtriusque studia ad μακροτοπία refert Galenus, de qua vide eiusdem li-

Lib. 36. cap.
5. & 8.

brum ad Thraſybulum.

40. Tantum Athletarum.) Sequitur ultimus locus contra Athletas, quorum studia & exercitia ita damnat & vituperat, ut ab Athletis tria bonorum genera, nempe animi, corporis & fortunæ auferat. Per Athletas autem intelliguntur ij, qui non quomodolibet exercentur fodiendo, arando, metendo, aut aliud huiusmodi opus faciendo, sed ij quorum unicum hoc est vitæ institutum, ut in lucta aduersarios vincant & deiiciant : cuiusmodi sunt Luctatores, cursores, pugiles, discum in sublime iaculantes, & saltus pernicitate contendentes: qui Græcè dicuntur, auctore Iulio Polluce, πάλαιαι, ἀρομῆς, πυκταί, διακρόδοι καὶ ἀλτμοί. Eosdem generali nomine ab exercitatione γυμναστικῆς vocat Hippocrates. Vide & Galeni lib. ad Thraſybulum.

Aph. 3. lib. 1.

41. Publicitus etiam apud maiores.) Vitruuius in præfatione lib. noni de Archit. tradit nobilibus Athletis maiores Græcorum præter alia constituisse, ut vectigalibus è Rep. constitutis perpetua vita fruerentur. publicè quoque alebantur in Prytaneo, qui præclarè de Rep. essent meriti, teste Socrate, qui cum à Iudicibus interrogaretur, quæ pœna dignum se existimaret, respondit se meruisse, ut amplissimis honoribus & præmiis donaretur, & ut sibi victus quotidianus publicè in Prytaneo præberetur.

42. Dignati sumus diuinis honoribus.) Quæ ad hunc locum pertinent, studiosè collegit Erasmus in prouerbio, Homo homini Deus.

43. Huc aduenisti ad mea ditia templa Lycurge.) Lycurgus ille nobilis Spartiata, ut Remp. suæ ciuitatis salubribus legibus constitueret, conscriptis ijs, quæ longa peregrinatione didicerat vtilia fore ciuitati, Delphos sese contulit, ut Dei quoque consilium in re sanctissima exploraret. Cumque Pythia consilium eius à Phæbo maximè probari, Deique potius quàm hominis inuentum esse respondisset, alacrior ad peragendum institutum factus, foro aliquot armatis occupato, leges suas perfert. Vide Plut. in eius vita, & Herodotum lib. 1. Vbi pro τῷ ἀνθρώπων, legitur, αἱ καὶ ἀνδρῶν.

44. Archilochum.) Poetam Lyricum, cuius mordacitas vulgo celebratissima fuit. Horatius, Parios ego primus Iambos, Ostendi latio, numeros animosque secutus Archilochi, non res & agentia verba Lycamben.

Lib. 1. Epist.
19.

45. Innumera cū sint mala per omnem Græciam.) Euripidis sententia de *Athletis*, petita ex primo *Autolyco*, citante *Athenæo* lib. 17. Primum ij domi sibi consulunt parum bene. Græcè legendum, οἱ πρῶτον οἰκεῖν οὐδὲ μὲν δάουσιεν εἶ, οὐτ' ἂν δαύαιτο. & paulo post, εἰς τ' ἀμύχανον, vel εἰς τ' ἀμύχανα, non ἀμύχανα.

46. Affectio Athletica non est secundum naturam.) Quoniam *Athletæ* immodico cibo & immoderata exercitatione, carnis molem corpori adiiciunt, & humorum quoque cumulant copiam: necessario fit, ut eiusmodi corporis affectio sit periculosa. Tunc enim periculum adfertur, ne aut *Vasa ipsa*, supra modum repleta, rumpantur, aut extincto calore nativo, mors sequatur repentina. Vide cōm. Gal. in aphor. 3. lib. 1. Ceterum locus iste desumptus est ex lib. Hippocratis de *Alimento*, idēque explicatus à Galeno lib. ad *Thrasymbulum*.

47. Ut singuli per vices conuiuii imperarent quæ vellent.) *Plutarchus* *Symposiacōn* decade prima, problemate 4. docet *Symposiarcham*, id est, conuiuii regem & magistrum ac modiperatorem, ut vocant *Nonius* & *Varro*, ijs tantum sermonibus, spectaculis, ludisque dare locum debere, qui ad proprium *Symposij* finem spectant, cuiusmodi sunt res seriæ & viles, multa venustate & hilaritate conditæ. Tale fuit *Phrynæ meretriculæ* factum, quod hîc refertur. Est autem Græcè legendum, ὁ δὲν οὐδὲ τὸ τῆς Φρύνης ἀκαίριον.

48. Habent animam veluti multo immersam cœno.) Corpore saginato alimentisque suffarcinato, necesse est animi lucem in rebus obscuris indagandis hebescere, conturbari, errare & vagari. Contrā ἀντὶ ἐξουὶ, ψυχὴ φωτεινὴ, inquit *Heraclitus*, hoc est, splendor siccus, animus prudentissimus, quasi dicat, Sicco lumini sapiens animus similis est. Vide *Plutarchum* comment. priore de *Esu carniū*, & *Galenum* libro, Quod animi mores sequantur temperamentum corporis.

49. Summè bonam corporis habitudinē periculosam esse.) Εὐεξία duplex est, vna salubris & naturalis, altera Athletica, quam periculosam esse tradit *Hippocrates*, cū ad summum sit plenitudinis gradum perducta, id est, cū *Vasa ipsa* humoribus sic expleta sunt, ut plura citra vitæ discrimen capere non possint, quemadmodum suprâ annotauimus.

Aphor. 49.
lib. 2.

50. Sanitatis studium est non satiari cibis & impigrum esse ad labores.) Cum ad satietatem usque cibis ingeritur, ut viribus grauat, à natura concoqui non possit, morbum procreat, pristina sanitate destructa. Contrà fit, si mediocritas in cibis assumendis obseruetur. Eadem est ratio exercitationum, quibus si quis rectè usus fuerit, plurima commoda hinc consequetur. Nam ex instrumentalium partium per mutuum ipsarum attritum duritiæ, comparabitur tum ad edendas actiones robur, tum consueti exercitij ferendi facilitas: ex caloris augmento, concoctio fiet & distributio felicior: ex valètiore deniq; & citatiore motu spiritus, meatuum expurgatio, atque expulsio excrementorum. Secus fit in otio & desidiosa vita. Porro sumpta est hæc sententia ex lib. 6. τῶν ἐπισηµεῶν, sectione 4. aphor. 20. ὅβι πόνος, id est, labor, ἀπὸ τοῦ γυµνασίου, hoc est, pro exercitio, usurpatur. Ut & aphor. 49. lib. 2. & multis aliis in locis. Erasmus legit πάντων pro πόνων.

51. Senis illius.) παλαιὸς hoc loco & ætatis & eruditionis est prærogatiua, qua Hippocratem intelligit Galenus, ut & comment. in aphor. 8. lib. 1.

52. Labores, cibi, potus, somni, venus, omnia mediocria.) His verbis & modum ipsum singulorum definiuit Hippocrates, addito ad finem dictionis epitheto, mediocria: & tempus æquè signauit ipso sermonis ordine. Hanc sententiam Hippocratis, sumptam ex lib. 6. τῶν ἐπισηµ. sect. 6. aphor. 5. fusiùs explicat Galenus initio lib. 2. sanitatis tuendæ.

Lib. vltimo
politicorum.

53. Et ingurgitant sese nonnūquam & vi.) Vnde ἀναγκαστῶν appposito nomine appellat Aristoteles rationem victus Athletici, quasi dicas, cibi sumendi necessitatem.

54. Dormibant reliqui Diuique hominesq;.) Parodia est ex Iliad. B. qua paucis mutatis, quæ de Ioue dicebantur, Athletis accommodat, & in eos detorquet.

Côm. in lib.
2. prognost.

55. Iuxta naturam viuentes.) Temporibus Hippocratis, inquit Galenus, non aliud fuit è more viuere, quàm è natura viuere. Nunc verò plerique morem illum maiorum immutant. Vnde exclamat Iuuen. saty. 8. Si dormire incipis ortu Luciferi, quo signa duces & castra mouebant. Somnus autem non modò spiritus labore vigilijsque dissipatos restituit, membrorumque ac sensuum defatigationem

tigationem tollit, verumetiam naturales functiones, maximèque concoctionem & retentionem corroborat: cùmque ἀναλογία esse debeat inter cibum & somnum, ut videlicet somni mensura ad proportionem alimento, quod ingestum est, respondeat, Athleta verò ad mediam vsque noctem sese cibis ingurgitent: necesse est ut in multam lucem stertant, & tum demum surgant à somno, cùm ceteri iuxta naturæ præscriptum viuentes, ab opere redeunt, & cibum requirunt. Reponendum in Græco, ἀπὸ τῶν ἐργῶν ἡκουσιν, προἔξουσιν. 56. Et Rhododaphnis eorum terga perfricantur.) Ex Rhododaphnes siue Rhododendri fruticis (officinis Oleander dicitur) lentis & flexilibus ramis, rudes & virgulæ fiebant, quibus gymnastæ suos Athletas, qui nudi certabant, perfringebant, si fortè aut ex arena fugerent, aut alioqui suo officio minùs rectè funderentur. 57. Omne nimium naturæ inimicum.) Naturæ substantia in symmetria, id est, certa & commoda elementorum proportionem consistit: quam cùm omne nimium corrumpat ac labefactet, idem quoque animantis constitutionem resoluat, necesse est. aphor. 51. lib. 2. 58. Affectio Athletica.) Medicis διὰ τοῦ αἵματος, id est affectus, appellatur, non ea quidem præcisa argutæque significatione, quam Aristoteles in Categorijs vsurpauit, sed admodum ampla & multiplici verbi potestate, quæ omnem corporis constitutionem contineat, siue in substantia, siue in qualitate & in tēperamento, siue in conformatione & figura, siue in magnitudine, siue in numero ea consistat. Differt autem ab habitu, quòd hic stabilis sit ac perpetuus, ille affectus inconstans & mutabilis. 59. Neque enim recipit accessionem.) Cùm natura semper concoctionem alimenti, distributionem, in sanguinem mutationem, adiectionem, agglutinationem & assimilationem moliatur, quando nihil adijci potest solidis corporis partibus, & referræ venæ non habet iam, quo distributum alimentum recipiant, tum necessario periculum imminet, ne aut ipsæ venæ rumpantur, aut extinguatur calor naturalis. Ut igitur in corpore alter sit nutritioni locus, pleniorē illam habitudinem oportet sine mora per euacuationem soluere. Aphor. 3. lib. 1. Cornelius Celsus, Si plenior, inquit, aliquis & speciosior, & coloratior factus est, suspecta habere sua bona debet: quæ quia neque in eodem habitu subsistere, neque ultra progredi possunt ferè retrò

quasi ruina reuoluuntur.

60. A Litis illis Homericis.) *Homerus Ili. ἰὼτα, Aten Deam fingit, quæ noxas ac turbas soleat immittere rebus mortalium, acribus oculis, ac velocissimis pedibus præditam. Post eam autem longo intervallo consequi Litas Deas, quæ quod Ate turbauerit, sarcire moliantur. Hæc & Strabis oculis facit, & pedibus claudis, hac fabula declarans, offensas esse citas, reconciliationes tardas, & difficilius esse sarcire concordiam, quàm rumpere. Citatur & hic locus Homeri à Galeno lib. de exercitatione parua pilæ, ubi in Græco desideratur dictio λιτῶν.*

61. Complentur destillationibus.) *Hoc est, tenuibus humoribus, qui ex oculis profluunt nobis nolentibus, & à lachrymis hoc solum differunt, quòd lachrymæ ferè semper voluntariè fluant. Hanc destillationem ἐπιφορὰν alio nomine vocant Medici.*

62. Articulorum compages vt frequenter intortæ.) *λιγυσμός est artium contorsio, confractio & luxatio. Est enim λιγύζειν idem quod σείζειν, κάμπτεω κὴ κλάζειν. Vnde per metaphoram pro Vincere apud Theocritum Idyl. 1.*

Lib. 2. de
morb. causis.

62. Quævis ruptio ac diuulsio.) *ῥήγμα, siue ruptio, auctore Galeno, solutio est carnosæ partis: σπασμός, id est, diuulsio, est vnitatis solutio in nervosa parte, Vtrunque citra vulnerationem: ῥήγμα in carne, σπασμός in nervis.*

63. Velut ab vno fonte.) *Scribendum Græcè, ἀπὸ πηγῆς μιᾶς, ab vno fonte, hoc est, ab vno principio, ab vna origine. Cicero lib. 3. offic. Qui fons est fraudum, maleficiorum, scelerum omnium. Erasmus legit, ἀπὸ γῆς μιᾶς.*

64. Gymnastæ qui eos curandos susceperant.) *Gymnastes vocabatur, qui gymnasio præerat, id est, loco publico, quo Athletæ luctaturi, discum iacturi, aut aliud quippiam tale facturi conueniebant. Gymnastice pars est Medicinæ, sanitatem exercitatione mediocri conseruans, non molem corpori adiiciens, qua aduersarij prosternantur in certaminibus: quod facit vitiosa illa gymnastice Athletis propria, de qua abundè Galenus libro ad Thrasybulum.*

65. Quos ad pancratium aut pugilum certamen.) *Pancratium certaminis genus fuit, ex pugilatu & lucta compositum, sic dictū, quòd totius corporis viribus connixi pancratiastæ certarent:*

Pugilatus

Pugilatus erat, cum plagæ tum castibus tum pugnis inferrentur. Paulo post legendum Græcè, ὅταν δὲ καὶ τῶν μιλῶν τι, & mox, τοῦτο γὰρ, εὖ οἶδ', ἐν φήσουσιν.

66. Num ad agricolationem?) *Plato lib. 3. de Rep. ait Athletarum habitum inutilem esse ad omnia civilia negotia. Galenus* lib. ad Thra. syb.
Athletas comparat Epeio Homérico, strenuo quidem pugili, sed ad cætera vitæ officia ignauissimo. Græcè legendum, ἢ δεξιῶν, ἢ ἀροῦν, ἢ τι τῶν ἄλλων. &c.

67. Pueris nuper natis.) *Scribendum Græcè, νεογνῶν παίδων: & mox, οὐ γὰρ δὴ πού ὅτι τοὺς σκυτολόμους. &c.*

68. Coturnicibus & perdicibus.) *Sunt enim ὀρνίθες κοτυκιστοί, quæ sese in pulvere volunt, Arist. lib. 9. de historia animal. & Plinius lib. 10. cap. 33. scribunt perdices instante aucupe gleba & face sese operire. Plutarchus quoque lib. de industria animalium, ait perdicēs pullos, quantisper fugitare per ætatem non licet, assuefacere, ut quoties venator instat, supini sternant sese, gleba & face corpori super ingestis. Ceterum quod Athletas dicit toto die puluerescere, referri potest vel ad pulverem quo sordidabantur, qui certabant in Olympijs, vel ad ἀπλὴν, hoc est, pulveris contactum, quo se inspergebant luctatores post unctionem, ut mutuas prehensiones admitterent. Nam duo tantum memorantur, qui ἀκοντῖ, hoc est, sine pulvere vicerint.*

69. Interpretatus est oraculum.) *De muro ligneo, quo significabatur prælio navali esse decertandum apud Salamina: ubi Xerxes à Themistocle superatus est. Vide Herodotum lib. 7. & Plutarc. in Themistocle.*

70. Quòd si quis dicat voluptatem corporis inter bona numerandam.) *Triplex fuit veterum philosophorum opinio de voluptate: prima eorum qui nullam voluptatem bonum esse censebant, neque propter se, neque propter aliud. Altera eorum qui nonnullas in bonis numerabant, multas in malis. Tertia erat sententia eorum, qui asserebant, etsi omnes in bonis essent, tamen non posse summum bonum in voluptate numerari. Vide Aristot. lib. 7. Ethic. cap. 11. & 12. Non est, inquit Cicero, necesse, tanquam meretricem in matronarum cœtum, sic voluptatem in virtutum concilium abducere.*

Lib. 2. de finib. bon. & mal.

71. Prima diuisione.) *Artium prima diuifio est in liberales & mechanicas: fecunda in θεωρητικὰς, ſine λογικὰς, id eſt, in inſpectione ac æſtimatione rerum poſitas, qualis eſt aſtologia: in πρακτικὰς, quæ in agendo ſita ſunt, nihilque operis poſt actum relinquunt, vt ſaltatio & Muſica: & in ποιητικὰς, id eſt, effectrices, quæ opus, quod oculis ſubicitur, poſt actum relinquunt, vt pictura. Galenus quartam etiam addit χηρικὴν, quæ non eſt in opere, ſed in rei alicuius adeptione, cuiuſmodi eſt venatoria.*

F I N I S.

Federici Morelli Hendecaſyllabum.

*En Iamotius Æſculapius fit,
 Altræue Hippocrates ſuo Galeno:
 Ægris nec dedit artibus ſalutem,
 Laſis ſed tulit Artibus medelam.*

Summa Priuilegij Regis Galliarum.

HENRICI III. Galliarum & Poloniæ Regis priuilegio ſancitum eſt, ne quis Typographus excudere, Bibliopolæ diuēdere audeat ante octo annos Galeni Paraphraſin in Menodoti Exhortationem ad liberalium Artium ſtudia, ex Eraſmi interpretatione à Federico Iamotio Medico recognita & annotationibus illuſtrata, præter Federicum Morellum Typographum regium, cuius typis, opera & diligētia excuſa fuit. Qui ſecus fecerit, libris & pœna in ſanctione æſtimata multabitur, vt fuſius Regio diplomate continetur: dato Pariſiis, 5. Nouembris, anno 1583. ſubſignato, per Conſilium,